


607




王子安集
三


Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19

Blue Cyan Green Yellow Red Magenta White 3/Color Black

TIPPEN Color Control Patches © The Tiffen Company, 2007





王子安集卷之九

唐龍門王勃子安著

明閩漳張燮紹和纂

書

上劉右相書

蓋聞聖人以四海爲家英宰與千齡合契用能
不行而至春霆仗天地之威以息相推時雨鬱
山川之兆故有玄蛟晚集憑鶴鼎而先鳴蒼兕
晨驚運龍韜而首出竝能風騰霧躍指麾成烈

士之致虜屈虬奔談笑坐羣卿之右未如越蒼
海棄行間排紫微謁天子於是遭不諱之主擁
非常之位龍章鳳徽照其前鏘金鳴玉疊其後
三靈叶贊超然奉天下之圖四海承平高步取
寰中之託君侯之富貴足矣聖朝之付遇深矣
故知陽侯息浪長鯨臥橫海之鱗風伯停機大
鵬鍛垂天之翼及其投形巨壑觸丹浦而雷奔
假勢靈颺指青霄而電擊神氣洋洋謂鱗翮使
之然也殊不知兩儀超忽動止繫於無垠萬化

糾紛舒卷存乎非我是以陳平昔之智士也俯
同降卒百里奚曩之達人也親爲餓隸當其背
強敵轉康衢雄慮耿於風雲危途迫於朝夕豈
自期榮稱相府西藩專虎據之圖寵冠齋壇東
向舉熊飛之策顧盼可以蕩山岳咄嗟可以降
雷雨遂令用與不用是非於楚漢之間知與不
知得失於虞秦之際故歿生有數審窮達者繫
於天材運相符決行藏者定於已君侯足下可
不謂然乎借如勃者眇小之一書生耳曾無繫

鐘鼎石之榮非有南隘北閣之援山野悖其心
迹煙霧養其神爽未嘗降身摧氣逡巡於列相
之門竊譽于時匍匐於羣公之室所以慷慨於
君侯者有氣存乎心耳實以四海兄弟齊遠契
於蕭韓千載風雲託神知於管鮑不然則荷裳
桂楫拂衣於東海之東茵閣松楹高枕於北山
之北焉復區區屑屑踐名利之門哉至尊以搖
河徙岳之威當立地開天之運聖人有作羣材
畢舉星辰入仕揖讓朱鳥之門風雨稱臣奔走

蒼龍之闕方欲停旒金室引成康於已任闢廣
瑤林復堯舜於茲日可謂明明穆穆盡天子之
容貌矣抑嘗聞之丹山九仞煙峰非數篲之功
紫極千門雲臺俟萬楹之力故天下至曠神器
不可獨專天道無私玄勳有待而立書曰元首
明哉股肱良哉好問則裕自用則小况掌萬國
之權受一人之寵動見臧否言知利害君侯足
下何時易耶雖有大命不資童子之言而恭此
小心敢進狂夫之說伏見遼陽未靖大軍頻進

有識寒心羣黎破膽昔明王之制國也自近而
及遠先仁而後罰徵實則效存徇名則功淺是
以農疏千里僅踰重石之鄉禹截九州不敘流
沙之境豈才不及而智有遺哉將以辨離方而
存正功也雖至人無外甲兵曜天子之威王事
有征金鼓發將軍之氣而長城在界秦漢所以
失全昌巨海橫流天地所以限殊俗關土數千
里無益神封勤兵十八萬空疲帝卒驚烽走傳
駭秦洛之畔飛芻輓粟竭淮海之費於是乘奸

放命者出繩纏以生威因公挾私者入閭闔而
競法雖一物失所泰階延肝食之憂而百戰方
雄中國鮮終年之樂圖得而不圖失知利而不
知害移手足之病成腹心之疾征稅屈於東西
威信蹇於表裏語曰勝之不武不勝爲辱天下
之責四面至矣誠可遠凝高策上薦忠言決人
事於去就合天情於終始遂令回麾轉檄背青
丘而驚列障分亭巡蒼波而守昔者齊侯以力
方城爲楚國之辭虞帝崇文苗人失洞庭之險

况乎仗德綏亂以直乘邪明逆順之端聳萃夷
之望雖復舳艫沸海旌旗觸天鐵山四面金城
千里亦不能爲敵人計矣此君侯之未諭一也
蓋聞星廻日運御洪荒者貞夫一電照風行制
寥廓者歸乎靜易曰復其見天地之心乎語曰
動之斯和綏之斯來是知源潔則流清形端則
影直大道起而仁義息神化周而市獄定雖復
體元立教菁災耀知遠之書順時宰物宥罪發
精微之典而况澆風易漸淳化難歸孔明耿介

於當朝子輿殷勤於易簣蓋有絲也伏見邊凶
尚梗殊恩屢發亾命山澤者日月相趨朝脫桎
梏夕還囹圄姦徒抱袂因時立僥倖之謀頑夫
頓足中路紆吁嗟之慘皆絲寬勝於猛人迷所
習勸沮不彰廉恥相冒亦有公卿失職恥受珪
符之任郎官有釁俯捨銅墨之榮又焉可以弘
張風流抑揚衆務者也且夫朽索克羈不收奔
馬之逸輕緡振網或隨吞舟之勢况非常之化
方洽於齊人無妄之思乃及於
將恐匡衡

管子 靈沼於下泉矣古之善爲國者不然信
賞而必罰道德而齊禮澤配雲雨而無曲惠威
匹雷霆而絕私戮交書聳幣仗慈厚之師投金
散璧樹仁明之長故雖開衢室蓋明堂亦將四
三皇而六五帝矣此君侯之未諭二也蓋易曰
天地之大德曰生聖人之大寶曰位何以守位
曰人何以聚人曰財是知發揮地利農桑啟其
業振蕩天功泉貝流其用伏覩前制屢擾事非
畫一廛市蕭然人情怪動夫補簡竝用未盡交


易之宜輕重齊行適啟兼并之路於是連闔掩
闔者閉肆而乘其屈布衣韋帶者闔門而受其
困五方競爽務淺術以相雄百郡爭勝驅末技
而成弊田夫織婦衣食鮮終朝之給巨馭洪商
輿馬挾封君之勢蓋有繇來矣故曰國儲闕於
九載則公上無所給家廩乏於三年則妻子非
其有夫陰陽覆逆天地之常數百六運窮堯湯
所不免一旦洪泉決地大旱焦山風雨於一歲
之間霜雹於數州之境繁運廣役首尾於中外

王千安集 卷九
六
杳稅增徭日夕於都鄙燮陰陽者將何以處之
一夫竊議公之盛德虧矣愚謂嚴程峻法絕輕
陋之貨則奸鎔之源塞矣訟風正典重耕耘之
務則邪贏之計沮矣然後遠弘教旨大變流俗
法立有犯而必施令出唯行而不返違公竊鑄
者具五刑之戮因時力田者懸一命之賞不然
則賈生晁錯復流涕而言矣此君侯之未諭三
也嵩衡不拒細壤故能崇其峻江海不讓纖流
所以存其廣是以星臺曉闢上台忘吐握之勞

月殿宵典中宇軫山林之慕知夫御天下者必
待人也詩曰濟濟多士文王以寧未見君子憂
心如醉伏見皇明遠燭帝采遐宣張樂岱郊騰
勲社首徵廉察孝瑤壇虛不次之階署行議年
璿檢動非常之詔天下可謂幸甚矣於是友月
朋霞之客背青臯而至馮唐顏駟之才排紫閣
而集夫豈知終始異數涇渭同流蘿薜失圖簪
纓解體惜哉羣英霧散名侯招蔽善之嫌天下
雷同君子鮮長鳴之地而欲招絕足致真龍難

王守安集 卷九
矣此君侯之未諭四也易曰拔茅連茹以其彙
征吉豈非順物不若招類報國不如進賢陽事
昇而雨露歸陰駕疑而風霜厲莫不觀時有記
撫氣相求窮則獨善其私達則兼善天下而利
已疵物者以自任爲身謀知進忘退者謂專榮
而得計豈知夫尺波易謝寸磬難留陵谷好遷
乾坤忌滿君侯足下出納王命升降天衢激揚
鳳辰之前趨步麟臺之上亦復知天下有遺俊
乎夫心之精微口不能言也言之微妙書不能

文也伏願闢東閣開北堂待之以上賓期之以
國士使得披肝膽布腹心大論古今之利害高
談帝王之綱紀然後鷹揚豹變出蓬戶而拜青
墀附景搏風捨臺衣而見絳闕幸甚斯不爲難
矣庶幾乎麤卯不棄終感玄枵之精駿骨時收
或致飛黃之錫書生王勃歿罪歿罪再拜



上絳州上官司馬書

月日龍門百姓王勃再拜奉書于司馬上官公
足下蓋聞靈化出於窈冥帝圖寄於寥廓聖人
生而萬物睹太階平而四國會故曰有非常之
后者必有非常之臣有非常之臣者必有非常
之績至今雷奔雨嘯風旋電轉拾青紫於俯仰
取公卿於朝夕雲臺迫漢南宮列元宰之圖霜
戟羅門北闕據名臣之第嘗見之矣至若時非
我與雄略頓於窮途道不吾行高材屈於卑勢

孔宣父之英達位未列於陪臣管公明之傑秀名僅終於郡屬有時無主賈生獻流涕之書有志無時孟軻養浩然之氣則亦有焉豈非妙造無端盛衰止乎其域神期有待動靜牽乎所遇向使太公失於周伯則旗亭之屠父韓信屈於蕭何則轅門之餓隸又焉得鷹揚豹變吐納風雲者哉故曰知與不知用與不用觀夫得失之際亦窮達之有數乎其有邀時譽忘廉恥徇苟得設向背於朝廷立縱橫於勢利舉三寸之舌

屈辱豪門奉咫尺之書逡巡下席皆自謂材足以動俗智足以濟時鐘鼎輝其顧盼冠蓋生其籍甚豈知夫四海君子攘袂而恥之乎五尺微童所以固窮而不爲也此蓋莊周有言所以得意而忘象得象而忘言語曰談何容易易稱書不盡言知談之不易而欲言之盡以是思之良可知矣下官者康衢之賤耳嘗聞闕里之言頗挂平輿之目豈不知塵形俗狀游水鏡而多慚抱鼓援鼙偶雷門而自失而欲刺鵠飾鳧唐突

肩餘者邪徒以登山泛海庶測高深執炬傳螢
希增日月三奔九合干官聞管仲之風千載一
時君侯受鮑卿之託是敢陳其徑庭不然則秋
風明月西江畱獨往之因桂嶠松巖南山有不
羣之地矧區區者而重高明之闕闕哉君侯極
天分構振瓊樹而韜霞帶地疏源握珠胎而冠
月鱗軒羽殿瑤臺降卿相之榮鵠印蟬簪金社
發公侯之始青臯獨唳望鴻漸而翻霞丹穴高
鳴對鵷池而矯霧嚴助以賢良待詔未厭承明

汲黯以方正拾遺終榮臥理藩維克振旣叅來
暮之歌邦國不空自有康沂之相加以雄材廣
度散琬琰於胸懷逸氣適文運風霜於掌握迫
青霄而構含煙霞之涯渼莫尋振滄渤以流謙
江漢之波瀾未測耀靈桂於趙席垂棘知歸辯
羣籟於莊軒懸匏自託賓階夕敞清河銷驥繫
之虞虛榻晨披元禮得龍驅之地方當翊贊宸
極羽儀台屏豈徒偃仰州縣勞事藩庭而已哉
借如僕者言不滿於鄉黨豈不出於堂闕東海

取樂於簞瓢南山畢志於文史餐花佩葉入蘭
室而談玄挹露攀霞坐松扃而嘯逸揚子雲之
澹泊心竊慕之嵇叔夜之逍遙真其好也未嘗
露才揚已飾小智以驚愚假勢憑時託中人而
樹迹遍遊天下寒心於將相之門獨守太玄側
身於名利之境嘗謂奉琴卮於北牖詠詩禮於
南陔坐商洛而折雲英臨江湖而採煙液生願
畢矣而屬鸞扃停逸頓虛不次之階鶴板徵賢
累發非常之詔天下有道吾豈匏瓜承達人一

顧之榮辱公車再辟之禮平津侯之博物終屈
奉常賈大夫之才名猶逢絳灌况庸者而可免
於此乎君侯要津先據圖海盛於當時下官覆
篑方勤爲山始於今日雖陵澗谷變終非入室
之賓而晝詠宵吟敢預升堂之列夫以幽明不
測尺標見天下之心巨細相傾寸管合義舒之
度豈非道存斯貴理在必亨霸略近發於輿歌
皇圖不隔於芻議故有榮枯絕等奉推轂而欣
然年勢不侔受分庭而罔愧風規可接惟君侯

體之今古未殊則下官願矣常恨霜松列澗萬
尋無罩月之期露草滋山寸莖有梢雲之望斯
則穀實困於兼濟才位難於俱立况乎地勢不
足以誇俗容貌不足以動人遑遑藪澤安足以
奉高明之味唾也所冀蠅階賤質附雲足而追
騷蚋序輕姿託霜毛而絕海委名勵已蛟鱗申
獨斷之能偶迹當仁驪珠鮮闇投之懼天衢可
望指鵬程而三休巨壑難遊伏龍門而一息勃
歿罪歿罪

爲人與蜀城父老書

蓋聞天地作極不能遷否泰之期川岳薦靈不
能改窮通之數豈非聖賢同業存乎我者所謂
才榮辱異流牽乎彼者所謂命是以龍驤鳳峙
一作翥伊周成翊贊之功含糗羹藜顏冉困棲遲
之病或先號而後笑或始吉而終凶事不可量
功未必定則知洪濤未接長鯨多陸歿之憂層
風未翔大鵬有雲傾之勢池鱸井鮒亦將鼓鱗
而輕之田鳩野鸚亦將騫翮而侮之及衝溟渤

王子安集 卷九
接扶搖吹波則江漢倒流騰氣則虹霓掩彩摩
赤岸負蒼天然後知其力焉吁韓信之無津也
昌亭之一餓夫耳馬卿之失路也臨邛之一食
客耳武不足以服衆文不足以動時長劍屈於
無知洪筆淪於不用洎乎雄圖躡運至尊納背
水之謀麗藻昇朝天子賞凌雲之作威加海岳
穀振廊廟彼淮陰之俠少成都之遺老也又焉
能知遠近哉是以鑑物於聲不於成賞士於窮
不於達是知卞和之得玉也精存於岸谷之間

張華之得劍也氣發於星辰之際夫豈琢磨成
器然後知其寶剗斷爲能然後知其用哉仰惟
鄉耆等竝玉山高族金堤勝侶列子弟於千城
耀衣冠於百代或以風雲去國公孫躍馬之年
鐘鼎從王諸葛攀龍之日門庭相接雕甍將綺
棟連陳機杼相和鳳攝將虬梭交響金漿玉饌
食客三千綠幘青裳家僮數百沖襟渺識人多
江漢之靈麗藻華文代有雲泉之氣北齋開敞
南館虛閒詩酒同歸琴書合契忘機得意恥稽

王守安集 卷九
阮之交疎虛席延賓恨原嘗之客少實煙霞之
藪澤風月之津梁者乎劉仲文之遠識不以乾
沒詣梁城閔仲叔之高風不以口腹累安邑雖
其已沒生氣猶存况乎屬宇宙之明當天下之
泰不能俯拾青紫高視縉紳攀北極而謁帝王
入南宮而取卿相脇肩側足求哀鍾釜之間低
首俛眉取齊升斗之末嗟乎誠下官所以仰天
漢而鬱拂臨江山而慷慨者也但時可以未遇
道可以未行志願可以未成功業可以未就古

之才足以輔王業躡迹屠釣之間功可以濟巨
川藏身版築之下百里奚之負販陳湯之丐貸
而况於庸者哉此僕所以駿奔於顧盼之餘自
致於恩光之末也且夫精神所感尚動神明意
氣相交豈慚車馬倘能投心季子遙存素紵之
恩援手應侯先立綈袍之贈豈人之情也能無
報乎方今白藏紹序朱律謝期天高而林野疎
候肅而江山靜輕蟬送夏驚晚吹於風園旅鴈
乘秋動宵吟於露渚絲纈成於南畝稊黍被於

東阡時計有儲願履多福下官薄游綿載飄寓
淹時歡躡相仍憂虞自積陟梁鴻之峻岳何暇
長謠臨阮籍之長途唯知慟哭庶憑賜給以濟
飄危輕訴短懷佇流嘉耗

又

蜀都廣鎮岷嶺奧壤山分玉宇木向金陵景貺
有期英靈間出榮問休暢幸甚幸甚夫神有可
迫淥波驚七柱之音道有可符玄霜扣九鐘之
節豈道窮精秘妙聽察於無聲理實杳冥玄應
通於不測波流柱響波無入柱之因霜落鐘鳴
霜非扣鐘之具况乎言忘意得臭味相求目擊
道存神明已接鄭僑之逢吳札無謂殊方阮籍
之對嵇康自然同氣僕雖不敏嘗從事於斯矣

嘗謂薰蕕不共器梟鸞不比翼是以類乎方者
按風雲於千里乖乎類者起山川於一面抑嘗
聞之士之生也其迹可擯而道不可藏其身可
辱而志不可奪其有拂衣投臂遯形滄海之隅
裂裳裹足獨立高山之頂量腹而食度身而衣
以鐘鼎爲芻豢以衣冠爲縲紲方欲策鸞鳳而
撫雲英鞭虹霓而採煙液其次排玉闕指金門
成賈誼之謨樹終軍之策因機入務懷素將相
之門沐露沾霜擁筆公侯之室然則拾青紫於

旦暮取功名於俄頃演文物而動寰中騰聲名
而振天下若下官者可謂慚二途矣而斂手長
揖強顏高視低心於蹇躓之辰忍恥於恓惶之
日哉涓濱畱釣鷹揚之業未萌緇源滯牧鴻漸
之資蓋寡及其攀穹運接靈期乘雲雷而清八
極和陰陽而調萬品則知冥機所運吉凶于倏
忽之間玄命所移飛伏於斯須之際日月自至
聊復爾耳方今炎飈謝節爽候關辰風高而宇
宙清霜下而亭郊肅歸雲止鴈流曙響於東津

落照開鴻寫晴規於北岸螢疎夕砌蟬促朝林
感序緣情故豐奇賞僕一違秦隴再革炎涼戒
征軸而無因指歸途而有倦故鄉迢曠曾山重
復吳宮尚遠頻驚去燕之心楚峽猶賒已下聞
猿之淚徒以風猷未隔道義相存幸承知己之
心稍緩他鄉之思昔虞公再見懸光白璧之前
季布一言猶定黃金之諾况交已成於杵臼道
已茂於金蘭希照窮途遠流嘉貺若使恩裁口
腹空畱安邑之賓惠闕始終取恨昌亭之客

與契苾將軍書

昊天不忱哲人終否畢公逝矣傷如之何敬想
情則懿親義惟良執非夫人之爲慟其誰爲慟
乎僕與此公早投交契夷險之際終始如一常
思竝建忠孝之蹟共申家國之讎壯志不就古
人所悲何圖一旦長訣嗚呼哀哉管仲不存叔
牙空在子皮已喪子產何依興言追昔良增痛
悼適得韋四郎書具承大郎雅意知欲以此公
碑誌託之下走夫撫今懷昔理寄斯文旌德敘


功事屬知已是以子期幽思感叔夜之形言伯
喈雄藻待林宗而無魏下走雖不敏幸託溪期
此而不爲誰當爲者但恐位卑先達才非拔萃
虛承厚賚不副高聞謹遣舍弟勛往面取進止
臨書啜泣慘惶不次


上百里昌言書

勃言鄉人奉五月一日誨子弟各陳百里之術
宣於政者承命惶灼伏增悲煉勃聞古人有言
明君不能畜無用之臣慈父不能愛無用之子
何則以其無益於國而累於家也嗚呼如勃尚
何言哉辱親可謂深矣誠宜灰身粉骨以謝君
父復何面目以談天下之事哉所以遲迴忍恥
而已者徒以虛歿不如立節苟殞不如成名悔
過儻存於已爲仁不假於物是以孟明不屑三

奔之誚而罷匡秦之心馮異不羞一敗之失而
摧輔漢之氣故其志卒行也其功卒就也此言
雖小可以喻大此勃所以懷旣往而不咎指將
來而駿奔割萬恨於生涯進一簣於平地者今
大人上延國譴遠宰邊邑出三江而浮五湖越
東甌而度南海嗟乎此皆勃之罪也無所逃於
天地之間矣然勃嘗聞之大易曰人之所助者
信也天之所助者順也是以君子不以否屈而
易方故屈而終泰忠臣不以困窮而喪志故窮

而必亨今交趾雖遠還珠者嘗用之矣書不云
乎弗慮胡獲弗爲胡成不勝憤激之至謹上百
里昌言一部列爲十八篇分爲上下卷庶竭私
欵少裨公政追思罪戾若投氷谷謹奉言疏不
備勃再拜





王子安集卷之十

唐龍門王勃子安著

明閩漳張燮紹和纂

論

三國論

論曰漢自順桓之間國統屢絕奸回竊位闔宦
滿朝士之陷忠義履冰霜者居顯列則陷犯忤
之誅伏閭巷則嬰黨錮之戮當是時也天下之
君子掃地將盡雖九伊周十稷契不能振已絕

之綱舉土崩之勢明矣嘉平中大黃星見楚宋之分遼東殷旭曰其有真人起於譙沛之間以知曹孟德不爲人下事之明驗也先時秦帝東遊亦云金陵當有王者興董扶求出又曰益州有天子氣從茲而言則長江劍閣作吳蜀之限天道人謀有三分之兆其來尚矣然廢興有際崇替遞來每覽其書曷能不臨卷而永懷撫事而伊鬱也嘗試論之曰向使何進納公業之言而不追董卓催汜棄文和之策而不報王允則

東京焚如之禍關右亂麻之屍何繇而興哉至使乘輿蒙塵於河上天子露宿於曹陽百官饑歿於牆壁六宮流離於道路蓋繇何公之不明賈翊之言過也於是劉岱喬瑁張超孔佃之徒舉義兵而天下響應英雄者騁其驍悍運其謀能海內囂然於茲大亂矣袁本初據四州之地南向爭衡劉景升擁十萬之師坐觀成敗區區公路欲居列郡之尊瑣瑣伯珪謂保易京之業瓚旣窘斃術亦憂終譚尚離心琮琦失守其故

何哉有大賢而不能用覩長策而不能施便謂力濟九區智周萬物天下可指麾而定宇宙可大呼而致也嗚呼悲夫余觀三國之君咸能推誠樂士忍垢藏疾從善如不及聞諫如轉規其割裂山河鼎足而王宜哉孫仲謀承父兄之餘事委瑜肅之良圖泣周秦之瘼請呂蒙之命惜休穆之才不加其罪賢子布之諫而造其門用能南開交趾驅五嶺之卒東界海隅兼百越之衆地方五千里帶甲數十萬若令登不早卒休

以永年神器不移於暴酷則彭蠡衡陽未可圖也以先主之寬仁得衆張飛關羽萬人之敵諸葛孔明管樂之儔左提右挈以取天下庶幾有濟矣然而喪師失律敗不旋踵奔波謙瓚之間羈旅袁曹之手豈拙於用武將遇非常敵乎初備之南也樊鄧之士其從如雲比到當陽衆十萬餘操以五千之卒及長坂縱兵大擊廓然霧散脫身奔走方欲遠竄用魯肅之謀然投身夏口于時諸葛適在軍中向令帷幄有謀軍容宿

練包左車之計運田單之奇操懸軍數千夜行
三百輜重不相繼敵援不相聞可不一戰而擒
也坐以十萬之衆而無一矢之備何異驅犬羊
之羣餌豺虎之口固知應變將略非武侯所長
斯言近矣周瑜方嚴兵取蜀會物故於巴丘若
其人尚存恐玉壘銅梁非劉氏有也然備數困
敗而意不折終能大啟西土者其惟雅度最優
乎武侯歿劉禪舉而棄之覩譙周之懦詞甘忿
憤而忘食聞姜維之立事又慷慨而言憇惜其

功垂成而智不濟豈伊時喪抑亦人亾乃知德
之不修棧道靈關不足恃也魏武用兵髣髴孫
吳臨敵制奇鮮有喪敗故能東擒狡布北走強
表破黃巾於壽張斬眭固於射犬援戈北指蹋
頓懸顛擁旆南臨劉琮束手振威烈而清中夏
挾天子以令諸侯信超然之雄傑矣而弊於禰
刺失於猜詐孔融荀彧終罹其災孝先季珪卒
不能免愚知操之不懷柔巴蜀砥定東南必然
之理也文帝富於春秋光膺禪讓臨朝恭儉博

覽墳籍文質彬彬庶幾君子者矣不能恢崇萬代之業利建七百之基骨肉齊於匹夫衡樞委乎他姓遠求珠翠廢禮諒闇之中近抱辛毗取笑婦人之口明帝嗣位繼以奢淫征夫困於兵革人力殫於臺榭高貴鄉公明決有餘而淡沉不足其雄才大略經緯遠圖求之數君竝無取焉山陽公之墳土未乾陳畱王之賓館已啟天之報施何其速哉故粗而論之式備勸戒俾夫來者有以監諸者焉

先天八卦十大演論

昔者聖人之作易也始畫八卦以通神明之德以類萬物之情以爲分太極者兩儀也分四象者八卦也成八卦者十六將也司八卦者十二月也分十六將者三十二候也分十二月者二十四氣也分三十二候者六十四卦也司二十四氣者三十六旬也進退於三百六十六日屈伸於三百八十四爻往來飛伏之理盡矣其孤虛消息之端極矣三才之道不可不及也五行

之義不能復過也翕之以幽明張之以寒暑會之以生歿申之以去就禍福生焉吉凶著焉成敗行焉逆順典焉賢者識其大者遠者不賢者識其小者近者奉之者則順背之者則憊圓立者稱聖偏據者號賢嘗試論之曰三才易之門戶也八卦者易之徑路也引而伸之終於六十四卦天下之能事畢矣陳而別之極於三百八十四爻天下之微理罄矣夫陰陽之道一向一背天地之理一升一降故明暗相隨寒暑相因

剛柔相形高下相傾動靜相乘出入相藉泯之者神也形之者道也可以一理徵也可以一端驗也故天尊則地卑矣水濕則火燥矣山盈則澤虛矣雷動則風適矣是以天下有風可以姤矣則地中有雷可以復矣天下有山可以遯矣則澤上於地可以臨矣天地不交可以否矣則天地既交可以泰矣風行地上可以觀矣則雷行天上可以大壯矣山附地上可以剝矣則火附天上可以大有矣風行水上可謂渙矣則水

在地上可以比矣雷出地奮可以豫矣則風行
天上可以小畜矣雷之與水可作解矣則風之
與火可以家人矣雷在風上可以恒矣則風在
雷上可以益矣風在地下可以升矣則雷在天
下可以無妄矣風在水下可以井矣則雷在火
下可以噬嗑矣風在澤下謂大過矣則雷在山
下可爲頤矣雷在澤下可以隨矣則風在山下
可爲蠱矣澤上有水可爲節矣則山下有火可
爲旅矣雷在水下可爲屯矣則風在火下可爲


鼎矣水在火上可爲既濟矣則火在水上可爲
未濟矣澤上有火可以革矣則山下有水可爲
蒙矣火在地下可以明夷矣則水在天下可爲
訟矣地下有水可爲師矣則山下有火可爲賁
矣澤上於天可爲夬矣則澤下有水可爲困矣
山下有天可以爲大畜矣則澤下有地可以爲
萃矣以山在澤上可爲損矣則澤在山上可爲
咸矣澤上有火可爲睽矣則山上有水可爲蹇
矣上天下澤可爲履矣則地下有山可爲謙矣


澤上有風可爲中孚矣則山下有雷可爲小過
矣山上有風可爲漸矣則澤上有雷可以歸妹
矣此天地以對成之義陰陽反合之理故卦相
次則反爻以成義易之八卦是也八八相生則
錯卦以興理因而重之是也故聖人之道可縱
焉可橫焉可合焉可離焉逆而陳之未嘗逆焉
順而別之未嘗順焉三畫以變雖天地之數可
無賴也九六相推雖萬二千五百之浩蕩不能
踰於三百八十四三百八十四之糾紛不能踰

於六十四重之以六十四不能過於八卦張之
於八卦不能過四象紀之兩儀兩儀之理達而
太極得矣故古往今來寒進暑退死生亂動是
非騰結未嘗非兩儀也而未嘗離太極也故曰
有寒有暑則兩儀不廢也無思無爲則太極未
嘗遠也見之則兩儀忘之則太極夫然故不捨
二求一未嘗離動以求靜未嘗離動以達靜也
有可有不可非聖人之謂也無可無不可是夫
子之心也然天下之理不可窮也天下之往不

可盡也有窮盡之地者其唯聖心乎有窮盡之路者其唯聖言乎故據滄海而觀衆水則江河之會歸可見也登泰山而覽羣嶽則岡巒之本未可知也是以貞一德之極權六爻之變振三才之柄尋萬方之動又何往而不通乎又何疑而不釋乎故孔子曰必也正名乎名者義之本也非聖人孰能正之哉若抑末執本研精覃思非聖人之書則不讀也非聖人之言則不取也庶幾乎神明之德可通乎萬物之情可類乎本

未之思也夫何遠之有君子可不務乎哉





平臺秘略論十首

孝行一

論曰昔之列桐珪建茅土者非一君焉至於孝
思可稱仁風茂著存乎細牒十一而已豈非生
於深宮之中長於婦人之手膏肓積乎驕慢情
奔淪乎嗜慾嗚呼有國有家者可不誠乎

貞修二

論曰美哉貞修之至也或抗情激操仗清剛而
勵俗或理韻和神抱直方而守道或旌奇表善

擢才於不次之階或剖滯申嫌措辭於難犯之地竝能以禮昇降以時舒卷旣明且哲以保其身盛矣哉原夫御俗裁風變彝倫者寄乎直全身遠害得隨時者存乎變夫然故進不違義退不傷生清貞靜一保其道委迤屈伸合其度易曰君子或出或處或默或語天下何思何慮同歸而殊途百慮而一致此之謂也

藝文三

論曰易稱觀乎天文以察時變傳稱言而無文行之不遠故文章經國之大業不朽之能事而君子所役心勞神宜於大者遠者非緣情體物雕蟲小技而已是故思王抗言詞賦恥爲君子武皇裁勅篇章僅稱往事不其然乎至若身處魏闕之下心存江湖之上詩以見志文宣王有焉

忠武四

論曰陰陽代興剛柔合運威恩參用以成化文武相資以定業况乎康侯自我宗子維城者乎

城陽之權略明決卒摧呂氏之變任城之志意
剛斷實啟有魏之業蓋有助焉陳思雅懷忠勇
義形家國表奏永昌洞曉兵數績著疆場長沙
武陵亦足云也

善政五

論曰東平以盛德匡時大典禮樂齊獻以至親
統物光濟中外淮陽安定峻必行之典安陸扶
風浚受遺之泣能義形家國理極忠貞使黃河
如帶垂芳不朽盛矣乎守方雅以調蕃政用公
直而掌朝論昂然直上凜有生氣衡陽太原亦
足云也

尊師六

論曰前史稱良藥苦口而利於病忠言逆耳而
利於行豈非事情竭於不顧主色期於難犯中
人以下罕免斯累其有抗辭必盡忠烈橫匪石
之心聞善若驚君王動順風之請相須之際良
可詠也清河之恭慎真懇雅爲□□上引聖朝
下託師傅和矣哉

褒客七

論曰原夫重藝尊師登奇佇逸道存萬里神交
 一面故有推輪擁篲寡人忘千乘之榮越席分
 庭上才當四海之禮斯實藩邸之盛事間平之
 用心也而有矯情役智揚逸名利之間窒隙蹈
 瑕乾沒英翹之地便辟脂韋飾其迹甘言巧辭
 運其辨假君王之顧盼用君王之威福傳曰好
 善而不擇人則前代有以之傾矣至於典諧文
 雅賞盡煙霞月庭廣闊風閨洞敞西園故事下

蘭坂而宵歌東苑遺塵坐槐庭而曉賦折旋書
 藝之園翱翔儻詠之際洋洋乎亦為樂之一方
 也

幼俊八

論曰夫濫觴懸米翻浮天動地之源寸株尺葉
 擢捎雲蔽景之幹豈非積微成大陟遐自邇易
 曰山下出泉蒙君子以果行育德故考其前事
 備之于篇

論曰大規諷九


論曰夫陵谷好遷乾坤忌滿哀樂不同而不遠
吉凶相反而相襲故有全中率行用心於不爭
之場杜漸防危投迹於知幾之地昔之善持滿
者用此者也諺曰禍不入慎家之門前代有以
之興矣至若中山激難重存親禮武陵變色復
延情愛子建之陳辭貢憤長沙之發對因機雖
亦各達其心未若洪慶之希叡也


慎終十

論曰詩云靡不有初鮮克有終若夫東平之奉

憲遵約耿介原陵之奏中山之見賢思齊慙
濮陽之託庶幾乎可謂慎終矣至于塵之奉行
文處中慰之遠述河間陳思尅已竝未易誣也

子塵以下
多訛誤





王子安集卷之十一

唐龍門王勃子安著

明閩漳張燮紹和纂

頌

乾元殿頌

并序

臣聞鵬霄上廓瓊都開紫帝之庭
鼇紀下清珍野闢黃靈之館兼山配極
照鸞闕於霞標薦水涵元湛驪宮於霧壑
斯則神徵語恠功潛鳥跡之初理涉非經道
昧鶉居之始授鳳書而稽碧

落仙構罕存按龜錄而質黃圖金模間起粵若
風移處閭增巢恢火運之機業拒嚮明上棟括
河圖之奧三堵布政詠匪日於靈臺百堵陳詩
頌斯干於考室亦有黃軒瞰月樵門頽九洛之
功璿闥排煙牧野構三河之酷御燕臺而臨北
極缺王度於祈招列雲閣而拒南山隕黃謨於
軹道然則卑宮喪禮采椽輕四海之尊豐屋延
災柏梁非萬乘之有雖因時立事奢儉殊流而
弘道在人興亾迭運靈光未造不窺九室之榮

景福宏規猶擁三方之壘瞻風舊史逮曹馬而
無譏觀跡故墟歷周隋而未得自我唐太陵遷
構均五方於鷓几之前中野凝圖調六氣於虬
牀之下坐圭臺而清俯仰畧緯齊明臨鼎邑而
重威靈雲雷合響得玄功於大壯其至在茲乎
我大唐雞渾制極樹神宰而制山河鶴識裁儀
闢太虛而有天地黃精吐瑞潛龍苞象帝之基
紫氣徵祥鳴鳳呈真王之表高祖太武皇帝虹
星湛色開寶胄於金壺蛟電凝陰發皇明於石

玉子安集 卷十一
紐白蛇宵斷行移海岳之符蒼兕晨驅坐邁雲
雷之業屬東隣委馭扇虐政於叢祠北拱隳尊
紊皇圖於寶極蜚鴻集野瞻烏鮮投足之因青
犢嘯風羣鹿無擇音之所天街五裂截鯨浦而
飛芒地紐三分觸鼇山而按節玄虬在御掃圻
甸而廓星都黃鳥分麾動扶搖而馭雲陣鑣官
杖鉞跨高陌而登元轡野韜戈陟圮壇而擁號
皇圖不恃聖人追卷領之風神器無私才子奉
褰裳之運太宗皇帝雲房揖契壓麟璽於庭軒

雷渚翔英擾龍鈴於高席八能亨運抗鷓邸而
杖朱髦十亂恢基臨鶴州而擁黃鉞唐雲秘族
潛開白水之徵代景廻輪光踐丹丘之運權輿
象緯削茅社而建瓊杓草昧風雲席羅圖而創
璿曆紫庭合粹括宇宙於宸襟丹旻凝尊運陶
鈞於寶思摘碧霄而鍊石上清耀魄之宮詔寰
海而捐珠俯睇陽侯之室功驅偃伯頓鸚視於
率封道被來王靜龍吟於武庫玄樞上運十年
開累聖之符丹竈昇遐遺範敞謀孫之畫皇帝

王子安集 卷十一
陛下椒庭製慶曜璿夢於霞庄蘭殿分休湛珠
衡於月館道凝瓊鎮下蒼掖而照重熙業峻銅
樓憑紫軒而揖羣后環四瀛於舜抱漏蟻覃津
栖十景於堯矜巢螟荷照上元開錄寶龜定皇
邑之模下武崇基飛龍錫帝臺之構貞明啟運
齊玉鏡於鸞門易簡成功偃銅符於鶴仗懷降
尊於襄野大階忘七起之勞念負重於焦原巾
席託三危之險臨翠媯而則道天孕時成坐玄
扈而被圖神超物妙星潯縱淑曳珠紱於銅臯

雲野疏祥抗瓊枝於桂浦素蟾登慶六虛克牝
馬之貞丹雀御林三雅合關睢之好璿宮夜靜
居龍憶而調元金房晨開御駕階而緝化芝庭
揖訓遠清和鳳之儀蘭珮承風競峻當熊之節
皇太子承雲紫座翊八柱於乾維湛粹青衢揖
三樞於地戶黃離踵耀太陽分銑樹之輝蒼震
荐音少海控銀河之色鶴筌飛奏想丹駕於瓊
山鮑俎捐芳齒玄冠於寶序彤闈問豎禮崇監
撫之威黼席典賢義極君親之愛若乃東門卹

胤疊仙構於熊山西苑承家導靈波於鴈沼桐
圭作瑞鳳毛曜丹穴之英茅壤分維麟距冠玄
丘之俊與宮廷粹闢朱柱於娥臺兌野流芬疏
紫蘭於別館頻隈毓範雲肩分戚里之驩覃與
凝規星閣絕郎官之請雕龍命職縱跳澤而驤
鱗翠鷄調司順義颺而撫翼月軒宵佇虞谿降
璿緯之精震帳晨披姜水洞金韜之蹟飛鶴書
而抽海狀桂壑於是投綸轉麟旆而揖山容松
澗繇其削衽軒圖瑞商泛花綬於雞林農紀祥

炎濯蘭纓於鳳水仙臺倣務三珪銓棘序之風
天秩調邦六府變槐衢之典金門獻納縱麟筆
於苔牋石館論思覈龜章於竹槩淹中訪禮蹲
龍搖壁水之波稷下談經飛兔躍環林之秀詞
庭吐鳳翫鳥跡於春黌書帳翻螢閱蟲文於夏
閣杏花千畝紺轅照帝籍之功桑柘三宮玄紱
降親蠶之禮圓丘上闢奉蒼壁於靈壇方澤下
凝列黃琮於寶墀朱紘翠瓊履霜懷四響之尊
複雷重簷涓日正三綱之首五靈奔慶冠蛇澤

五子安集 卷十一
於黃樞六祀銜欣颺麟煙於紺席遺弓積慕虔
深太廟之儀執豆推恩道振明堂之禮瑤山廣
樂備逸調於宮懸洞庭仙奏納遺歌於帝府九
韶分唱后夔清桂序之音六變回和飛鳳掌梧
軒之律樽俎拆旋之數苞舉陰陽堂庭節奏之
規彌綸宇宙靈襟索隱控風伯於詞林睿想鈎
深詔天英於筆海神窮獨照傍揆赤水之珍思
洽幾深迴寫丹谿之韻金壇紫露映銀籀而翻
華瑤林白雪藻瓊章而吐絢蟬機撮化銅渾將

九聖齊懸虬箭司更銀漏與三辰合運爽鳩分
職素雲頽鳥啄之祥神獬鬣司玄水照龍顏之
則黃沙鞠草剗叢棘而遷訛丹石滋苔仰甘棠
而息訟融臯再稔方聞外戶之謠昧谷千廂坐
溢康衢之奏百城煙峙望秋露而乘風千室雲
開合宵寔而組化彤幃獨選熊幡下蘆鴈之祥
墨綬分賢犀檢降槐鸞之祉筠驂佇信髦士剖
竹而相尋葦杖霑仁鮒叟攀輪而不暇龍蛇可
踐野人豐荷杖之躡雞犬相聞城尉輟鳴桴之

響五雲抽潤湛芳氣於璿臺六府威殷唱豐歌
於銅闕不戒而畀東戶恩周動植之津博施而
舉南風化偃胎萌之寓神謀備預儼七萃於丹
樞遠略防微肅千廬於紫衛元戎握節黃公授
犀闕之圖帝座聞聲玄女荐龍庭之策頰柯押
刃中權決勝於兩階白羽俄麾善陣推亾於四
表朱匡反景之域削蛇弭於文棧黑山明月之
鄉委龍琬於武帳錦軒星鶩控乾絡而觀風繡
服霞驚淡神絃而問俗川浮沒羽鯨谿靜丹浦

之虞陸薦飛毛熊獸動青雲之偵銀關驟雨望
紫陌而趨恩鐵幌馳風計彤闈而瀝思赤馬文
後之寶叢積乎郊虞統牛露犬之貢滿盈乎儲
邸青丘畫野不踰征賦之鄉蒼水奉圖未盡隄
封之貫且夫緯武經文宏業也舍幽育明至誠
也混齊六合大功也規模百代昌數也故能襲
九空而寧庶物劃千里而統諸侯休徵象德而
動嘉符觸類而至風揚畧洽藻乾慶於芳年司
節河清藹坤禎於明渚瑤枝結慶泉埃蕩玉蓋

之文瓊液浮甘天酒綴金莖之色黃蕤紫脫湊
仙穎於中畿翠萼丹莫疊靈株於上序駢眸候
日漾影蒙池比翰翻風栖光理本祥飛井絡震
鱗題瑞朔之元祉絢新郊枵獸紀和年之序具
靈篇之絕覘究仙謀之殊休天人之際交矣皇
帝之道備矣繇是三靈物覩扣蘭禁而棲誠九
服子來詠嵩宮而騁力去奢去甚不矜黃屋之
隆匪樸匪雕方順丹墀之請宸規相宅考周舊
於靈都睿覽思和獲秦餘於正殿羣臣列陛奏

蕭相之遺模天子臨軒採荀卿之故事炎洲八
桂筵仙拱於林衡岱畎五松委靈材於梓匠衢
宮記範萬機抗九戶之尊海孽移瑛千藥省十
家之費飛廉卷藹徹煙極而浮覺屏翳收津劃
星墟而置槩瑤階百雉光懸寶露之壇瓊壁萬
尋影絳崇霞之閣拖虹梁而四注星漢虧於上
榮疊雲棟而三休寒暑隔於中雷雕楹鶴企沓
勢分規繡桶虬奔殊形別起圓瑤布藻磬羽聲
於狼泉方鏡披蓮孕化璣於蜃浦芝樓對幄重

傳五日之風芸閣列錢彩銀三旬之霧文疏罩
迥陰兔息肩於綺寮翠幌籠霄陽烏鍛翼於珠
網豐隆按節下複檠而司階列缺施鞭低叢楹
而假道溫房佇幸煦芳景於佳辰涼室乘閒凜
徂颺於火序金鋪夕照若帝圃之輝瓊英寶綴
晨懸類阿房之聚銀燭煙丘碧桂竚珉陛而披
香雨岫頰筠夾璿流而颺影九衢翻翠襍仙卉
於中遠四照霏紅間靈葩於右戒神禽率舞光
浮肆夏之軒瑞鳥相鳴響叶鈞天之樂鈞陳宿

列儼雙碣於丹青綺繳霞周闢千門於紫露爾
其左肩嵩鎮申侯降太室之禎前枕莘郊伊尹
發空桑之秀揭熊山而北眺貝闕猶存覩龜溷
而西分瓊臺易接總交中宇廓川陸而疏畿竟
想善鄰揆風霜而建野然則因秦構極祖宗耀
金策之符作洛恢基我后創璿居之始援天引
聖隔代重暉橫紫都而可襲配玄宮而非遠故
能使神光夜燭鏡麟趾於文除仙滄晨華委鸞
章於繡礎靈爻密發八方昭大有之和寶篆潛

開六合啟同人之會兩儀交慶虛碧墀而翹旌
萬宇披歡指蒼車而候蹕雖青蒲頌德東朝獻
龍鳳之圖而丹極鳴謙南面動貂羊之詔百神
推策望璆徑而虔誠三讓奉符顧瑤壇而肅事
龜書吐瑞按五技而分營鳳策揚輝翔八鸞而
節步帷宮霧轉列芝蓋於中天帳殿星離軻蒲
輪於大野紫鱗克饋若大帝之共臨素鶴翔華
類羣仙之廣宴花開瑞雪委瓊饌而調芳綵絢
祥雲夾珠旗而曳影功推三祖銀繩勒東岱之

威業峻一人金策奉南山之壽道既成矣玄符
集矣代既貞矣元勳緝矣運三辰而虛玉柄風
兌渙其中孚懸五禮而偃金科雷坎光其作解
奔烽舉爵溢仙酒於中衢疊鼓分餽浹宸輝於
下里吞九重而上運控八聖而遐征翔赤驥而
睇風區吟翠虬而掩霄甸隱隱轟轟雷動天驚
回輿斜眄而降乎乾元之殿司宮庀職肅坻堦
而神行掌舍巡方煥巖廊而洞啟赫若朱螭負
漢而輝橫海之鱗默若蒼鵬架壑而振垂天之

翮千官曉次係銀榜而端簪萬戶宵披侯瓊膏
而肅帶靈戈列陞天官具三揖之儀雲輅克庭
宗伯寅九賓之禮瑤鯨戒響懸猛簏於端闈銅
狄分形肅嚴扃於左序排紫微而立極宸儀冠
明后之三俯黃道而披軒仙曆用乾元之九蕩
蕩乎何聖人之無外巍巍乎而神功之不窮也
臣勃席芳十步企景三冬雖承宣室之談猶窘
靈臺之影仙壇遠秘已多謝於祥鸛大廈初成
復攀榮於賀雀慨淡梁甫終乖捧日之歡恩極

甘泉未動凌雲之價神圖不測固流絢於丹滕
微志可存庶鐫芳於翠琬敢獻頌曰

紫扃垂耀黃樞鎮野銀樹霜披珠臺月寫嚮明
立極橫神廓社大壯檣爻斯于韻雅其一

鶉居化沒狙訛道長瓊構霞明璜軒露敞棄人
崇欲違天蠹象南巢不救東鄰長往其二

瑤緘考懿金板藏功道凝茅屋業盛蒿宮龍階
察祲鵷閣調風推訪華禮酌儉思冲其三

懸釐結疊傳翼生災千甍嶺接萬栱星開爭圖

王于安集 卷十一
絢侈福極凶來風寒碣館露慘蘇臺其四

十館瑩秦金房砥室千間架漢韜雲闕日濟惡

承危同亾異術傾軛未遠遺墟繼出其五

龍川結禍鶴塞稱符塵驚八際霧慘三都穹廬

寶極芻幕璿樞司宮墜典掌舍淪圖其六

蒼衢毓祉丹丘表聖鳳矯仙樞龍迴寶命道凝

金冊功馳玉鏡紫氣抽華黃暉疊映其七

神稽鶴識迹播雞渾重光累極翼于謀孫經天

緯象就日提元鸞軒湛粹鳳几裁尊其八

祥抽紫曆業照彤管珍雀朝翻仙蟾夜滿丹墟

獻跡青臺墜卵椒闔儀風芝閨奉欸其九

登三建緒明兩開儀龍譙霧鬱鵷禁霞披浪分

璿渚景峻瑤枝黃扉曉列丹轂宵移其十

龜文獵彥麟旌收逸桂客攀榮松賓改律紫鸕

開紀丹虬登秩縱壑搏颺登山捧日其十一

功融棘序道備槐庭不仁者遠惟道斯行煙搖

墨綬電轉朱駟境懷春翟野散秋螟其十二

鄭竹分科燕棠輟諷銅機化極珠囊業洞禮貴

丹虬樂調朱鳳珠珂獻寶綿鄉委貢

其十三

龍關靜柝鶴塞投弦歌呈豹尾舞進鳶肩銅橈

月斥鐵輶星懸繩幽架險驛霧馳煌

其十四

霧壇凝紫河宮湛碧翠蕙翻鸞丹莫候魄霜均

電散連珠契壁礪蓋籠霏花衢墜液

其十五

年和政美化極風調靈臺軫詠考室典謠循圖

訪典去泰捐雕道存南甬讓屈東朝

其十六

望雲裁構籠霄建宇方鏡星離圓璫月聚梓匠

傾思林衡授矩畫棋栖煌文軒架雨

其十七

芝房疊翠桂廡流丹霞張萬戶霧葺千欒重局

駐煥洞牖栖寒神加有敘貺入無端

其十八

帝圖臨御皇僚萃止電戟揮霜雲旌拒畧紫宮

可逼黃街易履鳳礎騰文麟庭抗禮


其十九

珠泥暢績銀繩鬱契鶴嶺雲明龍壇景惠道超

中古功推下濟惟帝惟天惟天惟帝

其二十

中古收錄平...
 和武...
 帝...
 聖...
 樂...



拜南郊頌

并序

微臣上稽龍繇下閱龜謀觀天地之至道考皇
 上之大節武宣七德未嘗踰息亂之鄉文招九
 功未嘗出昇平之域竝能懸日月而高視駕雷
 雨而先鳴或皮幣而踐天階或干戈而躡乾步
 至於理定創禮功成作樂振長策以敘諸侯設
 靈機而制羣動猶虞階已泰不能息洞庭之誅
 夏載克寧不能罷會稽之戮故將體剛柔而立
 本法震曜而崇威一戎而寓縣平四罪而華夷

服然後黃旗大輅詔殊號於圓丘電轉雲迴奏
玄符於孝理天下黎人知四海之安樂寰中殊
域奉三寧之康泰德兼祥風灑道與和氣游不
言而大寶用貞無事而元功有立捨彼代也其
誰與哉若夫應運而生繼天而作鼓動千載之
下超騰百王之上遂能發軒庭之景曜躡隋運
之頽風揖讓而取文明指麾而清函夏則我皇
唐得之矣高祖以黃旗錫瑞靜雲火之橫氣太
宗以赤羽登期補星辰之絕縷授瑤圖於斯邑

付璿磨於均臺人更三聖道昭千古於是俛臨
睿極趨四荒於鳳闕之前端委廟堂調萬國於
龍軒之下八鸞徐動頓湯文於後塵九駿長驅
佇堯舜於中路邗家之具得矣易簡之業存矣
猶有朱蒙爰俗違光蓬艾之間青激遺毗假氣
陶鈞之內背熊山而構虐擁狼潭而稽誅竊瀛
海之風波弄乾坤之綱紀漢圖西返惟收五都
之名魏律東窮未出三韓之險姦謀蓄於有漸
逆節成於不悔長蚊蚋之雷霆附豺狼之羽翼

豈知夫至人無外撫天下以爲家真數有歸乎
羣方而罪已三門遯甲黃公成不戰之師五壘
神兵玄女下先登之策肅牙璋而按律輝旄節
而分麾降南宮之元老裂西營之毅卒良將首
路偏戎竟野軸轡萬里旌旗四合金箱玉匱司
空憑首勝之威鶚視龍趨將軍仗萬全之略負
鼇丘而峻壁據龜壑而深溝一鼓而亭塞無塵
七縱而江山失險伐罪以明而不以衆懷遠人
於絕境均惠化於殊隣登若木以照臨折紅桃


以延佇然後分州列鎮對明月以收營返旆旋
戈部玄雲而振旅望神都而獻捷仰靈社以書
功辛夷謁於昭陵癸丑告于太廟時乘黑帝月
旅玄枵大唐有國之五十一年皇帝有天下之
一十九載也元惡旣殄萬宇清矣元勳旣輯萬
寶成矣以爲周郊上帝裁延肅慎之賓漢禮甘
泉未拯朝鮮之亂想玄功而反側奉先旨以遲
廻思答上靈之心以洽庶黎之望爰考古日遂
淨行宮有司具典乘輿乃出撫玄蚪戴翠鳳翾

鼓按節鯨鐘疏響千乘嶽動萬騎林迴星陳而
天行雷震而霧合是時未登夫泰壇也迺齋帷
宮宿帳殿華蓋移影鈎陳從蹕千營夕布亘蒼
野而煙凝萬幕宵懸背黃闥而霧列旣而屏翳
清曉飛廉警旦孫叔奉轡王良聳策雲藏星謐
宇曠山明旌軒具照簫笳互凝陟名嶽以告成
歷神丘而展事國容象物而動朝章視令而肅
宸儀有晬虛徐大帝之庭列侍無譁髣髴萃胥
之國於是襲衣服戒俎豆端瑞班儼萃旒樂懸

六代禮備三古奠惟蒼璧藉用白茅鳴孤竹之
簫管奏空桑之琴瑟感格以誠不以事動植咸
驩敬神以道不以華天人合應然後駐聲名於
上邑反文物於仙宮因雷雨而作施法雲天而
用響風行電舉未注景而浹九埏野忭途歌不
崇朝而晏六合我之玄極孚矣我之能事畢矣
趨帝宸而振足越皇衢以驥首不其休哉雖睿
化無方比神圖而絕唱而小臣不佞撫洪筆而
當仁敢作頌曰

遼河巨浸碣石危峯城分玄菟塞接黃龍憑遐
作梗恃險忘恭人殘鬼哭主闇臣兇有晉不綱
戎麾內逐帝隋失御皇輿外驚九縣塵征三靈
霧黷長茲下慢逋我天戮五材無隕千齡有聖
武創元基文清寶命波恬四海明宣七政息衆
以寧綏荒以令飛龍繼跡鳴鳳重光遂均夷夏
迭用柔剛戈船泛月劔騎橫霜風驅海石電掃
辰陽帝師無戰神兵有伐丞相陪麾司空伏鉞
危雲旦起長星夜發萬壘爭屠千城自廢功超

薄伐義極兼詠殊方底定善陣徐迴歸俘獻捷
課績分材建侯清廟偃伯靈臺考事龜謨凝清
鳳展仰觀俯察享神作祀道則推天功非在巳
豐隆旦出招搖夕指神壇嶽立齋館雲深鑿旗
曉引葆吹晨吟山明野徹日降天臨鏘鏘盛服
肅肅珪簪俎豆畢陳笙鏞間撫玉觴分獻金罍
暢矩青帝鳴琴朱靈會舞上和下悅神歆神聚
收驩巨野反旆靈躔思周宇宙樂極寰埏德因
時立頌以詞宣帝之功也臣何飾焉



王子安集卷之十二

唐龍門王 勃子安著

明閩漳張 燮紹和纂

頌

九成宮頌

臣聞在天垂耀璿宮列乾象之墟在地班形珠
闕鎮坤靈之野洎夫三精駢運卽寥廓而爲宮
九聖旋游遍洪荒而可宅則有瑤房玉室崑山
分大帝之庭金屋銀臺滄海濯玄元之宇豈非

神明其道騁仙轡於無垠浩蕩其居示清都於
不宰若夫肩牖六合奔奔八神占日月而揆山
川駕陰陽而法天地非聖人其孰能與於此乎
至若文開遼甲仇峰城蒼后之躔樂奏鈞天峒
嶺駐黃軒之駕業融環堵下姑射而尋真道濟
巖廊望衡山而展事斯則三階遍下唯臨布政
之宮六位時乘未
巡方之館其後兩龍齊鶩
抗瓊闥而同嬉八駿高驤指瑤池而結興殷風
不競砂丘雄別館之娛秦道無章雲閣徇殊庭

之賞於是功虧大壯頌闕祈招豐屋同忘危輶
繼及遂使來年侯跡名山爲縱觀之場竝海遵
河沃野盡行宮之地皇天震怒於上蒼黎毗慟
哭于下土其有斟酌千古文明一代高宮不陋
茨山可仰祈誠東岳唐帝復衢室之尊用饗西
岐天子合鈞臺之運得其道也蓋有存焉國家
梯霄架極罄域裁基纂高丘白雲之胤鬱函都
紫氣之兆宸扉旣闢一宇宙而來王聖籙潛躋
貳乾坤而作帝高祖天旗夜立制黃馬而先驅

太宗日馭晨飛駿綠蟠而首出雖立極承祧之
業進燭前文而重光累洽之符歸功下武陛下
承靈太乙踵睿登三星虹沓祉電虬發慶丹書
碧篆神符煥河洛之文玉斗珠衡天骨挺皇王
之表用能捨桐圭而宣七鬯肅玉籍而揖宗祧
寫藹九天騰景萬里御風雷七曜於上博臨之
功顯用山川六府而下輔相之宜得玄宮密運
敷造化於靈襟黃屋神凝創經綸於寶思鳳闈
宵靜陰靈宣玉閭之華鶴禁朝趨離象峻銅樓

之景川分帝子控鯤壑而疏源岳動天孫擁熊
山而列鎮其化成也如彼其強幹也如此猶乃
停旒正室嚴續中軒玉階匪泰金門爲險佇虹
旂於月澗岳瀆生光飛鶴輶於煙臯江湖動色
漵溪逸彥塞丹井而歸風松磴遺英斬玄關而
奉制位兼河海九卿叅巨濟之功道合星辰三
事鬱經天之象朱幡緝化泣故老於中溪墨綬
宣風繞春童於上陌王化之基已洽天工之代
有序建銅儀而測曜象緯齊懸按璿璣而書雲

禎氛疊舉祥噏十二紫鷓調夏谷之音大禮三
千頽蛇應黃鐘之曲蠶功順令業著於青裳屨
磨迎春恩周於黛耜黃砂靜讞爽鳩興頓足之
悲丹石銷寃神解輟推鋒之計詠時和於帝壤
動植咸驩歌道泰於華封昆蟲自樂星墟列將
輝玉節而長驅天策神兵下金壇而決勝橫麾
赤坂葱山成不戰之郊命繳青丘桃野見其亾
之兆煙馳火微勵珠產而移琰雪鶯冰洲駕瑤
谿而納賚乾坤徑復載遵赤縣之封曦望環周

未出黃圖之域故夫含吐萬物至功也制平八
表大業也一陰一陽神通也乃文乃武聖圖也
用能使天不愛寶地不藏珍日月五行風雲四
序龍章鳳彩烏奕於郊墟黃鉉紫玉磊砢於坳
圉集風雲於翠筵浴甘露於朱英澤馬飛鑣山
輿結轍殊徽狎至祥書竭東郭之毫累譯同歸
朝冊盡南山之竹然後瑤壇備物陳帝服而展
皇儀石室疇庸登太山而小天下功弘事畢狹
廣宙而三遷風舉雲搖歷神都而一愆考遺基

於汶上稽故典於淹中光總章之瑞紀嗣乾封
之寶曆大矣哉昇中作睿握四海而爲尊則大
斯模肇三宮而配永憑太室而高視靈壇八百
坐明堂而恭已諸侯一萬時旣貞矣襄城辭訪
道之遊功旣成矣玄圃頓尋仙之駕錄是南宮
奏議和玄禁而成章西土謳歌指皇輿而佇眷
咸以殄臺靚穆陽靈開避暑之宮清序鈞調景
福制追涼之殿然則高棟浚宇威神之節也
順氣發生巡遊之大功也况乎石城金室偏興

井鬼之區珠藪瑤池宛在秦幽之境應雷輶而
出豫蒼帝其時面炎馭而思和朱明不遠雖途
吟野忤黎元忻望幸之符而屈已從人天子下
勞謙之詔候離苟而從宴尚惕三危清近縣而
移鑾猶詳再駕以爲三十六所帝劉非舜禹之
心四十二宮全趙典成康之曆詠荆臺而夕厲
思蒲坂而晨疑方奉後天之期俯順觀風之請
萬靈禔祉三辰合慶姬文考筮容成奏日千旌
鳳轉儼鏤象而星陳萬騎龍嘶伐靈鼉而曉胤

王于安集 卷十二 五
靜帷宮於綠野蕭帳殿於黃街奔攬捨而走陸
梁陳浮靈而候明月前驅雷竦下列缺於騰鞭
後乘雷驚起豐隆於驟轂瓊戈晝轉太陽疲轉
日之鋒玉劍宵翻懸象睹衝星之氣天旋霧散
岳運川迴林兵護野方神啟路黃麾紫蓋襍精
氣而西浮雲動神行背封巒而右指吐霧馳風
以臻夫九成宮禮也爾時峰橫地乳景戴天麋
分閭井而圖基蔭秦星而耀陞靈墟寶藏代興
汧雍之間峻阜長岑疊鎮岐梁之域丹溪碧洞

吐納虹霓偃柏叢篁騰遷雨霧獲秦餘於故兆
地擬林光訪周舊於遺風山連水滸前趨劒棧
玉壘千尋俯望斗城金墉萬仞架陰丘而北走
境瞰鄜祠分沓嶂而西馳塗交隴坂仙都密邇
猶連上苑之扃靈宮巋然直透崇岡之曲卽礪
基於礪道利在斯干固拱木於虞衡規同匪日
彌峰跨谷層城萬轉歷險乘危迴廊四注山祇
盡石出微道而終年風伯羸糧半長途而中宿
架千樓而檄極爛若神扶羅萬戶而窺天巍如

化立離堂早照斂日籠光於綺寮合殿宵浚歸
雲納影於重廡珉房破室畫棋相望綠岫紅巖
雕櫳間出玄熊蛭蝮俯棟宇而危心青鳥歸飛
仰靈軒而墜翼轉飛檐於秀嶧上出重冥蔭反
宇於迴谿下臨無地紅葩紫葍垂倒井而披文
金鎖銀鋪接重肩而炫色儼鈎陳於漢陌秦階
非遠設陛戟於煙在仙梯可陟華璫壁散掛明
月於崇朝密網珠連落奔星於已曙丹樑發秀
彩沓虹文皓壁凝鮮光含蜃氣銅龍對雷接飛

泉而瀑流鐵鳳連薨遡還颺而佇立雖南躔統
序北室開榮凜勁氣於叢楹起淒風於洞穴跋
烏失轡出澗戶而無光金兔低輪下山扉而變
色陰庭阻夏祝融無竊據之因邃屋乘春顛頊
定忘歸之策飛廉扣響赴北闕而神寒屏翳收
津跼南端而股戰蒼蒼八桂白露爲霜落落落千
松玄陰昧景金人列陛來危砌而思裘玉女窺
牕伏增巒而請纘陽秋代駕不凋仙圃之華天
地爲鑪未解幽陵之凍至若氣清乾步景霽山

王子安集 卷十二
維栖翠藹於崇榮列朱霞於複榭瓊枝累道移
綴文樛碧樹周阿光搖鏤檻靜簾帷而洞啟穆
羽相和肅坻堦而天臨纖塵不動宸儀有晬蓬
萊與城闕俱榮羣后多歡薜蘿共簪裾合賞巖
花落砌綴龍屐而成文嶂葉文軒拂鸞旗而追
影鱸峰轉藹香傳玉几之風石瀨鳴湍響入銅
壺之水乃有稜陽駕鶴奉丹墀而稱臣子晉吟
鸞下青蒲而謁帝箕精失耀傳說恭命於東廂
昴宿低芒庭堅奉職於西序三臺九署雲端極

目霓裳風髻闕下相尋張良臥疾攀赤松而有
地綺季來朝歌紫芝而忘返若夫功成肝食道
濟宵衣漢宮追聽覽之餘堯殿得巡來之隙霞
登月憇光睿幸於彤闈玉振金鼓藻宸章於翠
掖洛陽才子承閒盡宣室之談蜀郡詞人還奏
動甘泉之賦復有軒庭十四出桂闥而乘茵永
巷三千望椒塗而奉幣翊鸞臺之廣宴扈鴛砌
之仙遊羅綺芳兮四面春環珮鳴兮九重暮風
閨夕敞攜少女於歌筵月幌宵隴下嫦娥於舞

王季安集 卷十三
席玄房埃宴雲姬辭豹尾之歡紺幄承顏星媛
入魚鱗之戲若乃屯營櫛比對閭道而斜趨解
寺基分混文昌而外屬周朝瑞鸞轂叅叶律之
宮陳寶鳴雞響襍司晨之序名都廣會閭閻萬
室帝籙仙垣亭阜千里出村野塾家連菌草之
園谷飲川居戶有衮符之水故夫恩加草樹囿
原澤而無私道被翔行苑山川而不禁每至旻
天戒序高風嘯律虞官獻秋獮之儀司馬奉梁
騶之典將軍布卒略玄灞而東馳都尉關營繞

黃山而北睇於是逢蒙列階蚩尤竝轂材官發
射期門彘仞仗玄麾而直指鸚視千羣奮朱鬣
而橫行龍驤萬計層旗廣布出宇宙而三驅疊
鼓鳴鐘連雷霆而一呼前旌逐日夸父斷黃河
之流後騎超山共伯挾崑崙之柱近陵吐焰縹
奔電於長鋒灌莽生塵隕飛霜於勁鏃合戈鋌
而照地猛兇知窮振罟網而籠天騰龍失據崩
林礫石毛羣無挺險之資陰澤風山羽族落垂
雲之影長圍躩躩得駿馬於秦垌大輅徜徉載

王子步集 卷十二
飛熊於渭浦然後還師振旅考事陳功皮軒按
節牙璋復路視餘生於大野誓廣校於長阪班
腥於截梓之墟有蜡於長揚之館命奔蜂而舉
醕火照甘泉總輕騎而行庖雲驚上路殷兼萬
籥歌鐘空廣樂之庭禮被三雍玉帛盡塗山之
會龍胎鳳卵入禹膳而調芳石乳瓊漿委堯樽
而湛色恩霑下帛宴液仙宮雖大夫思濯鷁之
歡而天子可迴鸞之奏然後拜釐清廟考德齊
宮用玄工而不有宅太虛而無迹動崇易簡規

萬祀而化黃金道貫幽明徵百靈而響丹甃得
玄珠於舜海尚驚水危朗天鏡於堯儀猶動日
昃虔恭上帝東朝懸待諫之旌清問下人南面
聽登聞之鼓則有郊童俟蹕敢讓天師野老排
闥唯歌帝力風行比屋忠臣收折檻之謀化溢
康衢良使息埋輪之請設神規而動俗庶績其
凝握元符而發祉殊方合應華胥已泰濟羣生
於不歿之庭閭閻可觀致仙曆於無窮之境蕩
蕩乎發育萬物而顯諸仁洋洋乎包舉六氣而

藏諸用均兩儀而得一恥三皇而不四者矣臣
勃東臯賤節北阜幽姿常叨召見之恩驟玷明
敷之列書生謁相望闕推輪下客遊梁榮叅賜
帛終童立志空投函谷之繻馬令同時未給尚
書之筆雖玄機妙鑰已寂兆於忘言而詠德陳
功請追嚴於匪頌其詞曰

九門浩蕩三山超忽帝坐金房仙成玉闕浮丹
麗紫棲霞冠月真匠難徵虛談易越

其一

旋窺鳳紀極睇龍墳層巢化沒上棟爻分茅宮

蔽雨松殿來雲猶迷匪陋尚缺斯文

其二

道倫明一風遷繼五禮讚三宮詩歌百堵黃圖

未洽紫庭無輔局促墉垣逡巡度矩

其三

盛衰環襲沖盈舛鶩璿宇夏關瑤局殷樹奢窮

地絡毒流天步相日遄奔尋雲速什

其四

災延六國運逼三川分雄競侈禮僭圖全飛甍

月徑列廡霞阡乾谿敗楚碣石亾燕

其五

阿房秦構文軒五里建章漢立仙闥萬祀詭代

齊溼違天縱已望夷有壘甘泉不祀

其六

宛郊嗣籙譙鄉警衆蜀跨梁岷吳吞楚夢相宜

裁軌崇楹累棟雲闕同華泉臺罕共其七

晉圖終否胡風肆極霧黧丹園塵埋紫域皇階

不守帝庭無色帳殿相臨氈牆間飾其八

南承有宋北洎亾隋功慚戶牖守在城池樓船

水覘車陣山窺吳庭再毀代鼎三移其九

火德初融江陽振旅奄收淮船遂朝吳渚象錯

驕秦龍舟壞楚雄圖乃溢傾宮不處其十

海岳呈華風雷寫慶剪諸戎首光我靈命紫氣

雲蒸黃星月映輔商爲業遵唐啟聖其十一

景闕丹繩祥抽翠籙格天垂範模神鶩躅朱極

重光黃離繼旭道清金鏡時和玉燭其十二

徵規鳳闕毓訓鸞闈桐宮宿列桂郎霞飛台精

變道岳耀裁幾朝盈振鷺境比馴羣其十三

武韜弓矢文經步驟爽鳩議獄龍師掌奏玉帛

華夷提封宇宙譯書歲款祥圖月湊其十四

帝功得一乾元用九鏤玉天齊塗金社首神京

四邑明堂八牖燮而可大爲而不有其十五

宮望幸幸封竹悅伺隙披圖乘時徙轍赤駟

俟駕蒼虬按節月車宵移星闈曉列

其十六

方神護野岳將清塗廻麾嶠路逗蹕山樞千靈

電驚萬辟風趨釣臺有問岫無虞

其十七

五城分委雙巒抗影畫棋彌峰雕甍亘嶺煙闈

夜謐雲房晝靜竹殿栖寒松軒秘景

其十八

紫庭晨御彤闈早闢天子凝旒辟公奉壁薜蘿

齊致替裾混迹仙鶴隨輪靈鳧墜舄

其十九

風扃濬敞震廓藻邃玉網星開金鋪月墜山樓

獸矯雲臺鳥次複嶂披丹廻流轉翠

其二十

仇夷聖宅姑射神心樂翔丹鳳使引青禽義壇

葉暗禹洞花深洛分瑤水花跨珠林

其二十一

順時宣節分戎講將星騎朝飛雲羅夕張寶雞

獲祉非熊入貺駕掩岐蒐禮高秦望

其二十二

鄴庭未遠塗山有戮襄野迷軒清都有穆罕夷

乾步徒豐帝屋光總大猷允歸天祿

其二十三

命宮垂訓靈臺韻雅功映寰中頌流天下皇圖

已泰鴻筆難假帝有力焉惡非能者

其二十四

榮分上郎業盛文場爭開寶札競聳雕章氣凌
雲漢字挾風霜後之來者其在君王

忠武第四

榮開社稷業照旂常是恢藩化或固朝章功成
道洽身歿名揚唯忠與孝千載生光

尊師第六

善政第五

奔霆易馱巨壑難遊主明臣直撫類相求道行
言用性逸神休吁嗟盛軌從善如流

褒客第七

功惟應物業貴逢時君玉樂道上客含詞情起
月肆興入煙達文林辨囿何代無之

幼俊第八

列后雲騰英童霧躍年妙識遠理豐詞約寵照
玉旗文先銅爵勿疎小善方恢大略

規諷第九

三才集 卷十二
寵榮有極恭冲是守軸碎羣毛金銷衆口全忠
衛國順時藏垢周之宗盟異姓爲後

慎終第十

具覽藩猷遐窺國篆罕兼百行多褒一善履忠
存性慎終思遠生榮歿哀身沒名顯

